



犁頭符

在臺中東勢校栗埔路脣，有一間七娘媽廟，舊舊个廟肚供奉七支犁頭。罕得看著恁泥个信仰，了解過後正知，原來這裡肚有一段先民辛苦同大自然對抗个故事呢！

民國二、三十年，臺中寮下還當在開墾。在該看天食飯个時節，見堵著做風搓、落斗雨，大甲河會先出汶水，跔緊大水斯對上游磅磅滾沖緊落來，一下那斯同河壩埔打淨淨。該耕河壩埔个人，企高高、目金金看核自家个心血分水打走，想愛嗽都無目汁！大甲河水行到校栗埔，堵好一個大彎幹，河壩水斯在該位緊掙緊高、緊割緊入，同礮炭都沖撇。俚炭脣个人家，輒輒圍牆、禾埕、雞埕、頭牲也做下分水割去，一下斯溶入汶水肚，拉毋轉也救毋著。人若無走較拚兜，命都會畀收去哦！斯恁泥，見大甲河做大水，斯會危害著校栗埔莊个人命同財產。

歸莊个人有計恤去無計、礮炭結了結，還係擋毋核風搓天个大水對莊頭个傷害。有人去求神託佛保護、有人去尋覓公來制水，前前後後請來幾下个覓公，出煞符貼了貼，還係無效。大水一來，又同頭牲、田埔做下打淨淨，年年都恁泥，實在還衰過。

熱燻燻个六月天，有一日臨晝，一個打赤腳个覓公來到這位，聽著講，斯表示佢有法度制這水煞。莊肚个人聽啊著，遽遽放撇手項做緊个事集俚來，照厥吩咐準備好香案同犁頭愛來出煞。吉時一到，覓公先燒香請神，莊肚个人跔拜。覓公嘴緊唸咒，腳踏七星步，一手搖三清鈴、一手擎桃木劍，緊舞緊攘，一連請出七個犁頭，安在香爐肚，過唸好久个咒，還燒當多當多金紙。燒金紙个火衝都半天高，火屎滿哪飛，燒氣呵去硬硬企人毋核。毋過該兜圍緊燒金、看鬧熱个人，分火光照映去面紅紅、汗流脈落還毋退走。斯恁泥直直到半夜，法事正算圓滿結束。

翻轉月初，風搓過來咧，風狂雨大，斗雨連續拚兩日無停。大甲河水又大又急，淹(rhim+)撇河壩脣个石礮，闊茫茫个水面項大浪滾攪，看著十分得人驚。大水緊打緊落，來到校栗埔个大彎幹，「轟隆！」大水一下斯溜過去，激蹴來个水花比人較高。毋過，這擺水無頓恬落來，也無過割著炭脣个農地、屋舍。水退撇後，校栗埔莊歸莊人同財產做下平安，逐儕也安心咧。對該擺起勢，校栗埔莊斯毋識過分大水打著咧。

這下个校栗埔莊既經當鬧熱咧，當初時，該制水有功个覓公，想來應該也變仙咧。毋過，該七個犁頭符，到今還服祀在校栗埔莊項七娘媽廟肚，經過幾下十年，逐日還係有信眾會去燒香，感謝這七個犁頭符制水有成、守顧莊頭平安呢！

作者：徐姿華

☆詞彙學習☆

【犁頭符】leˊ teuˊ puˊ：犁頭法器。犁頭能犁山、破土，有開創突破之意，是道術中力量很強的法器。

【寮下】liauˊ ha+：東勢的舊地名。因早年開墾時木匠工人在此搭起「枋寮」，其周圍就叫「寮下」。

【斗雨】deuˊ rhiˊ：大雨。

【河壩埔】hoˊ baˊ bu+：河床闢成的田。

【緊掙緊高】ginˊ giugˊ ginˊ go+：此處指水因困住而致水位越來越高。

【緊割緊入】ginˊ godˊ ginˊ ngibˊ：此處指水勢強大而侵蝕土地。

【出煞】chudˊ sadˊ：解煞。驅除邪惡鬼怪等。

【緊舞緊攘】ginˊ muˊ ginˊ ngiongˊ：一邊搖擺一邊舞弄。

【激蹴來】giebˊ hongˊ loiˊ：水搖盪溢出。